

Gvangjsih Minzcuz Bau

ganhhau: CN45-0036 B.2019 Nd.7 Ng.24 liggaueq geijhah nienz ndwenloeg ngeihngeih

广西民族报

(壮文版)

主办:广西区民语委

出版:广西民族报社

出版周期:逢星期三出版

出版期数:总第3384期

Gaiq Daihseiq Cungguk-Dunghmungz Minzcuz Vwnzva Lundanz Youq Gveilinz Banh

Ndwen 7 ngoenz 17 daengz ngoenz 18, Gaiq Daihseiq Cungguk-Dunghmungz Minzcuz Vwnzva Lundanz youq Gveilinz Si banh. Ca mbouj geijlai 150 boux lauxhangz, bouxhek daj Cungguk, Genjbujcai, Laujvoh, Majlaisihya, Menjden, Daigoz, Feihlizbinh, Yeznanz, Yinniz, Vwnzlaiz, Yindu, Yizbwnj daengj guek daeuj haenx caeuqfaenh aen hoih neix.

Lundanz cujcz gyoengq lauxhangz Cungguk caeuq lauxhangz rog guek hopheux gij saeh "rangh ndeu loh ndeu" minzcuz vwnzva doxgyau caeuq

caeziengj, vwnzva lijyouz caeuq saek-heu hwngfat, minzcuz vwnzva lijyouz caeuq hawsingz hwngfat guh doxyaeng, caemhcaiq doenggvaq le 《Gveilinz Yungzhuz Senhyenz》.

Lundanz daezswng roxyiuj "rangh ndeu loh ndeu" minzcuz vwnzva doxgyau caeuq caeziengj, vwnzva lijyouz caeuq saekheu hwngfat, minzcuz vwnzva lijyouz caeuq hawsingz hwngfat daengj vwndiz, bangcoh coicaenh Cungguk-Dunghmungz minzcuz vwnzva gizdieg doxgap caeuq doengzcaez hwngfat.

Gaiq lundanz neix youz Gvangjsih Bouxcuengh Swcigih Sevei Gohyozgai Lenzhozvei, Gveilinz Si Yinzminz Cwngfuj, Gvangjsih Minzcuz Dayoz, Aen Cungsim Doxgyau Vwnzva Gozci Gvangjsih lienzhab cawjbanh, youz Cunghung Gveilinz Siveij Senhconzbu, Gveilinz Si Sevei Gohyozgai Lenzhozvei ciepbanh, youz Gveilinz Lijyouz Yozyen, Aen Cungsim Yenzgiu Minzcuz Gvangjsih Minzcuz Dayoz, Aen Yenzgiusoij Cuenghhag Dunghag Cunghyangh Minzcuz Dayoz bangbanh.

(Vangz Swhcang/王滋创)

SIUSIK DINJ

● Ndwen 7 ngoenz 19, Lungzcouh Yen banh aen hozdung geiqniemh laebdangj 98 hopbi doxdax doegsaw gingdiemj saekhoengz. Hozdung muzdiz dwg sonyinx gyoengq dangjyenz mbouj lumz goeknduj, geiqmaenh sawjmingh, gaenxmaenx guh daengz Lungzcouh gak loh gaijgwz caeuq hwnjguh ginghci bae, baujlouz cwngci bonjsaek, ceng guh dangjyenz senhfungh.

(Nungz Gihcunh)

● Ndwen 7 ngoenz 15 (liggaueq ndwenloeg cibsam) dwg cietfwen Bingzsiengz Si Yasiz Cin Banjyin Cunh Mbanjbanjyin bi gvaq baez haenx, Bingzsiengz Si Swhfazgiz fatok gij guh hong ciznwngz senhconz fapceih, bae daengz aen mbanj neix guh aen hozdung senhconz fapceih cawjdaez "faplwd haeuj mbanj", aeu faplwd cienz daengz lajmbanj, cienz daengz vunzlai, daezsang vunzlai faplwd yisiz, hag rox yungh faplwd henhoh gij gienzik ndanggaeuq.

(Moz Ginz)

● Geij bi neix daeuj, Denhngoz Yen gaenxmaenx sonyinx vunzlai dangdieg ndaem makbakhom, makdaezyouz daengj, doengzseiz, giethab hawciengz aeuyungh, doihengz hwngfat gij vunzsik "dinghdan nungzyez", sonyinx aen giyez lingxdaez caeuq nungzhoh ciemdingh "gunghswh + gihdi + byauhacunja + nungzhoh (ranzgungzhoj)" dinghdan, baujmaenh vunzlai souhaeuj, doidoengh daegsaek canjnieb hwngfat ndaej ndei.

(Banh Suhungz)

● Ndwen 7 ngoenz 18, Laizbinh Siveij Senhconzbu, Si Vwnzmingzban, Si Fulenz lienzhab guh aen hozdung angqhoh Cunghvaz Yinzminz Gunghozgoz laebbaenz 70 hopbi caeuq bi 2019 seizdaih moq vwnzmingz saedguh fwen cienzciengq gyahfungh ndei gyahyin ndei. Gyoengq canghfwen yungh fwen ndeidingq angqhoh Cunghvaz Yinzminz Gunghozgoz laebbaenz 70 hopbi, sonyinx gyoengq siminz laeb caeuq hengzguh sevei cujyi hwzsinh gyacizgvanh, yungh fwen ciengqgok gyahfungh ndei gyahyin ndei seizdaih moq.

(Cangh Cauzgvangj)

Lozcwngz: Swnjcienz "Feihyiz" Vwnzva Bangrengz Vut Gungz Gunggeng



Ndwen 7 ngoenz 20, youq Lozcwngz Mulauj-cuz Swciyen duzsuhgvanj, bouxswnjcienz dinfwngz raed ceij Mulauj-cuz Loz Vazcingh cingq son hagseng Mulauj-cuz lienh raed ceij. Mboengq gyajseizhwngq, Lozcwngz Mulauj-cuz Swciyen haiguh aen hozdung vwnzva leih lwgminz "swnjcienz 'feihyiz' vwnzva bangrengz vut gungz gunggeng", cingj bouxswnjcienz dinfwngz raed ceij Mulauj-cuz Loz Vazcingh daeuj son lwgnyez mbanjbya Mulauj dinfwngz raed ceij mbouj aeu cienz, hawj gyoengq lwgnyez roxnyinh gij yinxdaez vwnzva ciuhgeq minzcuz, fungfouq ndwenngoenz gyajseizhwngq. Ndaw doz dwg bouxswnjcienz Loz Vazcingh son lwgnyez raed ceij.

(Liu Gvanghfuz/廖光福)

Dasinh Yen Mbanjmingzsw Ndaej Senjhaeuj Aenmbanj Youqgaenj Lijyouz Lajmbanj Daengx Guek

Mboengqneix, Vwnzva Caeuq Lijyouzbu goengbounh le mingzdan lajmbanj buek daih' it yaek ndaej senjhaeuj gij mingzloeg aenmbanj youqgaenj lijyouz lajmbanj daengx guek, Gvangjsih ndaej haeuj 11 aen yangh, Dasinh Yen Ganhhah Yangh Mbanjmingzsw gwnz buengj miz mingz.

Dasinh Yen Ganhhah Yangh Mbanjmingzsw daengx bi gingjsaek lumj veh gyaundeih raixcaix, miz gij mingzdaez "bya dah valangz" caeuq "diegyouq bouxndoj", Dahmingzsw raezrangrang lae gvaq daengx aen Mbanjmingzsw, henz dah doenghnaz gvangqlangh, aenmbanj gyaundeih caeuq henz dah giuzfaexdog, nyez-

cuengqvaiz gwih vaiz, vunzguhnaz gvak naz daengj gij gingj doenghnaz, yienhok fuk veh doenghnaz miz bya miz raemx, bouxsai guh hongnaz bouxmbwk daemjbaengz ndeu.

Aenmbanj neix baengh gijndei guekgya 4 A gaep Mingzsw lijyouz gingjih caeuq swcigih hajsing gaep Mingzsw lajmbanj lijyouzgih, gyavaiq hwngfat lijyouzyez Mbanjmingzsw. Yinx haeuj aen giyez ndei douzcienz, haifat gij lijyouz swhyenz Mbanjmingzsw, hwnjguh gingjih, ranzdozninz, nungzgyahloz, aen bouq gai huq lijyouz miz daegsaek daengj, doengzseiz, hix haenqrengz doicaenh hwnjguh gij giekdaj sezsih goenggungh, hwnjguh

lijyouz yizcan(hamz diengzhaex), diuzroen heu lijyouz, diuzroen byaij gwih ci daengj, vih bouxhek daeuj youz Mbanjmingzsw gunghawj gwn, youq, byaij, youz, cawx, guhcaemz daengj fugsah, coicaenh Mbanjmingzsw lijyouz ndaej laebdaeb hwngfat. Hwngfat lijyouzyez, gyalai gij souhaeuj vunzmbanj Mbanjmingzsw, daiqdoengh daengx mbanj cizdij ginghci hwngfat. Bi 2018, aen mbanj neix ginghci souhaeuj 2760 fanh maenz, daengx bi ciepdaih bouxhek 217.54 fanh vunzbaez, vunz guh hong lijyouz 383 vunz, vunzmbanj bouxvunz bingzyaenz bi souhaeuj 11862 maenz.

(Liengz Gveivah/梁桂花)